

Leo Tuor survegn Premi grischun da litteratura

■ (anr/fa) La Fundaziun Premi grischun da litteratura, fundada da la Soroptimista Milly Enderlin, conceda mintg'onn ina distincziun dotada cun 10 000 francs. Il premi dal 2009 ha survegnì Leo Tuor da Surrein. Blera gliעד era vegnida mesemna saira en la biblioteca chantunala per festivar la surdada dal Premi grischun da litteratura a Leo Tuor. Er cusseglier guvernativ Stefan Engler, il pli aut chatschader grischun, era preschent. L'autur sursilvan ha survegnì la distincziun per sia ultima ovra «Settembrini. Veta e meinis», in cudesch davart la chatscha, il mazzar e las stailas. «Ensemen cun 'Giacumbert Nau' ed 'Onna Maria Tumera ni ils antenats' furma il cudesch ina trilogia impressiunanta che fa stremblir a moda giagliarda ils urdens stabilids da la societad», ha ditg Anna-Alice Dazzi, la presidenta dal cussegl da fundaziun da la Soroptimista da Cuir Milly Enderlin, il qual surdat dapi il 1999 mintg'onn il Premi da litteratura rumantscha, taliana e tudestga, dotà cun 10 000 francs. La finamira è da promover auturs da tut las trais linguas grischunas. La laudatio ha tegnì il criticher litterar Roman Bucheli.

«In microcosmos che reflectescha l'entir mund»
Ch'ins legia en ils cudeschs da Leo Tuor bler da la mort, da perdita, da ravgia e da tristezza, da dolur e da naradads, ha ditg il laudatur, «tuttina n'enconusch jau betg blers cudeschs ch'èn uschè alleghers e che transmìdan cun las pli simplas furmas da poesia il cordoli en fortuna, la dolur en calma e la ravgia en umor». Che Leo Tuor quintia baingea dad in mund pitschen, «en sias fra-



L'onurà Leo Tuor flancà dad Anna-Alice Dazzi, la presidenta dal cussegl da fundaziun Premi grischun da litteratura e dal laudatur Roman Bucheli.

FOTO F. ANDRY

sas sa reflectescha dentant per la lectura ed il lectur il mund entir». En sia ultima ovra lascha dir il scriptur a Settembrini ch'ìs chatschaders duessian baingea leger, «cun mesira», ma en mintga cas betg scriver, ch'ì dettia gia avunda cudeschs, en ils quals ins vegnia a savair dapli da l'autur che da la materia.

«Nus pudain esser cuntents che Leo Tuor n'ha durant ils ultims ventg onns trais giadas betg tadlà il cussegl da Settembrini», ha manegià il laudatur Roman Bucheli, «e nus pudain be sperar ch'el na fetschia quai er betg en il futur.»

Passiun per la vita elementara

Leo Tuor, annada 1959, ha passentà sia uffanza a Rabiús e Mustér. Suententer avair fatg là dal 1979 la matura B ha'l lavurà fin il 1985 tschintg onns sco redactor da la gasetta rumantscha «La Talina». Suententer ha'l studegià filosofia, istorgia e litteratura a Turitg, Friburg e Berlin. Terminà ha'l dal 1987 cun il diplom da magister secundar phil I. Suententer ha Leo Tuor

cumentà a far da paster, a pertgirar vatgas, pli tard nursas. Dal 1988 è cumparì «Giacumbert Nau», per il qual el ha survegnì pliras distincziuns. Da l'onn 2002 ha'l publicgà «Onna Maria Tumera ni ils antenats». Tuts dus cudeschs èn vegnids translats en pliras linguas. Dal 2006 è cumparì «Settembrini. Veta e meinis».